

四庫全書

集部

欽定四庫全書

集部

香山集卷三

一至三

詳校官庶吉士臣翁樹培

主事臣呂雲棟覆勘

謄錄副貢生臣杭光晉

欽定四庫全書

集部四

提要

香山集十六卷

別集類三 宋

臣等謹案香山集十六卷宋喻良能撰良能字叔奇義烏人登紹興二十七年進士補廣德尉遷國子監主簿復以國子監博士召兼工部郎中除太常寺丞兼舊職出知處州尋以朝請大夫致仕宋史不為立傳惟金華先

民傳載其仕履頗詳其兄良倚弟良弼亦俱以古文詞有聲于時集中所稱伯壽兄季直弟者是也良能所著忠義傳二十卷諸經講義五卷家帚編十五卷俱久佚不存其集義烏志作三十四卷焦竑國史經籍志作十七卷世亦無傳獨永樂大典中所錄古今體詩尚多核其格律大都抒寫如志不屑屑為絺章繪句之詞楊萬里朝天集有送喻叔奇知

處州云括蒼山水名天下工部風烟入筆端  
頗相推許而良能集內亦多與萬里酬唱之  
作故其詩格約畧相近特不及萬里之博大  
耳又陳亮龍川集題喻季直文編一篇云喻  
叔奇于人煦煦有恩意能使人別去三日念  
之輒不釋其為文精深簡雅讀之愈久而意  
若新是良能之文亦有可自成一家者惜其  
詩僅存而文已湮沒不傳矣今從永樂大典

採掇裒次而以南宋名賢卜集所載參校補入釐為十六卷庶猶得攷見其大畧其集稱香山者案律中次韻李大著春日雜詩中有清夢到香山句自注曰余所居山名蓋以地名其集云乾隆四十六年九月恭校上

總纂官

臣紀昀

臣陸錫熊

臣孫士毅

校

總校官

臣陸

費

墀

墀

欽定四庫全書

香山集卷一

宋 喻良能 撰

賦

喜賦 并序

昔江文通為恨賦備盡古今之情致予謂恨既有之喜亦宜然因擬之而作喜賦焉

逖攬竹素往躅具存喜緒爰集喜氣滋殷予為畸人未嘗有喜想像古者喜而不寐粵若劉項爭雄太公留楚

視以必殺置諸鼎俎侯生壹說脫之虓虎徒馭既備上  
馬徑去革羈思為歸心變孤囚為大父又若號為上公  
震為長子沈疴既嬰溘然以死衆賢環視袖手莫施有  
扁斯鵲曰猶可治療以刀圭起僵行尸沈玄夜而復反  
遊岱宗而還歸四體和平天地清夷子卿在外十有九  
年始末一節嶮巇萬端去草實而食鼠仰雪花而餐羶  
分為死節寧龔生還忽虎節之來臨知雁書之既達狼  
心易慮許歸漢闕李陵置酒而高會九人相隨而進發



行復行兮紫塞春遠復遠兮邊地月又如安石督軍前  
臨大敵重將帥之指授懼人馬之辟易俄北騎兮宵遁  
致淮淝兮尸積捷布聿至圍碁方適雖攝書而置床亦  
過戶而折屐別有都尉風流王姬嬋娟人既離而復合  
鏡已缺而重圓恨昔鳳兮影隻慶今枝兮理連掖亭麗  
姝京都俊雅藉紅葉兮為媒鞭紫鸞兮同跨恍魂夢之  
遊仙說衾稠之蘭麝若乃脫身輓輅奮迹新豐朝奏暮  
召言聽計從如巨魚兮縱壑猶鴻毛兮遇風暢積祀之

湮鬱豁平生之心胸嗟乎喜雖一名事有萬族魯侯終  
燕於壽母文公乍聞於子玉陶朱縱棹兮五湖季倫暢  
飲兮金谷虞卿賜白璧兮一雙吏部浮酒船兮百斛莫  
不發瑩粲於笑貌見紅黃於眉目故夫喜既首於七情  
蓋亦先民之所欲

古甕賦

甕得於紹興丙辰今二十有八年矣愛其古  
甚故賦之其辭曰

丙辰中春積雨新霽令僕夫以駕牛治南村之廢地耕  
未竟畝洞然有聲躑躅不進人牛俱驚下有物兮泯然  
天成象田家之瓦盆肖茅茨之土釧薄言扣之其聲鏗  
鏗款識不存莫知其年四耳附離一蓋孤圓口絨六寸  
之壁腹受三斗之黍不窕不櫛不苦不窳團團焉藥藥  
焉何其肌理之堅而形模之古也固藏甚密宜有所盛  
發而視之枵而不盈噫嘻悲夫豈秋草朔風閨人愁心  
思寄征衣欲擣寒砧藉爾清響振其遠音歲久俱廢塊

然獨瘖者歟。豈天高氣清，落月橫生，幽人妙興，將調素琴，假爾逸韻，相其悲吟。人琴云亡，草蔓見侵者歟。又豈白刃縱橫，竄伏長林，埋金韜玉，規人莫尋，至寶忽逝，獨留幽深者歟。抑豈却立鍊形，鶴駕鸞駟，害其丹砂靈泥，是緘五色羽化，此焉帶淫者歟。夫物無隱而不彰，器無幽而不聞，美陽得尸臣之鼎，太康獲汲書之簡，皆所以秘之於古者。發之於久遠，顧此甕之誰藏，必因余而後顯。喻子於是濯以清泉，藉以香荃，貯濁醪之渾渾，充皤皤。

腹之便便謝漢陰之低抱伴吏部之高眠旅滑稽之鴟夷拍浮丘之酒船每傾倒而一醉益足以攀七賢而追八仙矣

菊賦

并序

喻子有園二畝畦菊百本日遊其間乃為之賦其辭曰

西風兮東籬金英兮紫枝著嘉名兮既遠宜衆卉兮等夷標黃華兮月令寓落英兮楚辭生高岡兮蠲原隰吟

鮑昭兮賦潘尼互松兮偕杞徑淵明兮宅天隨秋日兮  
淒淒秋露兮離離萬木槁兮既下一雁鳴兮初飛送孟嘉  
兮帽落逆王弘兮白衣其操兮箕山之潔其韻兮竹林  
之絕瀏兮禦寇之御風慄兮馬曹之泛雪臨清流兮子  
陵之居瀨含夕霏兮真長之望月孤叢兮特秀幽香兮  
微透紫蝶兮黃蜂凜既寒兮猶湊聘芙蓉以為妃兮命  
秋蘭以為友官槐斂迹以杳逝兮巖桂容沮而色黝揖  
江梅以先發兮曰子之茂兮其庸可後邀黃葵以旅處

兮曰珠玉其在側予豈不知予之陋一束既多兮魏帝  
之賜少者百年兮甘谷之壽枝葉老硬兮飽予腹於五  
月葩華丰好兮悅予目於重九歲植百本日遶百匝兮  
抑臨風而三顛

辭

和歸去來辭

并序

何秘監道夫蜀人也賦歸去來辭歸守潼川  
出其辭以示予因次韻以送之

歸去來兮樂莫樂於公之歸欣故里之可還何去國之  
足悲悵習俗之方溺景先民而是追等窮通於夢幻孰  
為是而孰非思江山之娛情厭京塵之染衣占東蜀之  
分野粲藩星與少微嗟彼士人乃競乃奔修容飾詞伺  
候權門長裾日曳成性莫存何如先生癭杯匏樽醉羣  
經以嘯傲潮紅臉於酡顏泯鳬鶴之短長知天命而自  
安涉巖塗以干榮笑七貴與八關肯多慾以外慕每反  
照而內觀洗俚儒之呶訾挽淳風而使還琴一曲以娘



絃笛三弄而追桓歸去來兮知公欲與造物游跡一已  
以邈然故不忤而不求冥此心於得喪復何懼以何憂  
惟五馬兮行春聊放目乎平疇行者爭塗渡者爭舟寄  
高情於阡陌眇一壑而一丘消田里之愁歎霽政化而  
日流歌袴襦於梓潼藹譽處而滋休已矣乎如公盛德  
能幾人行胡無人為王留飄然任公之所之漫說效龔  
遂誠心慕安期或公田而種秫或私力以耘耔斥三入  
之巧宦陋四愁之俗詩流英風於千載公真淵明復何

疑

五言古詩

詠懷

一變方佐舜二公還相周三傑從高祖四皓屈留侯五  
龍翔日邊六逸嘯溪頭七賢傲竹林八仙隱糟丘九老  
山中卧十友方外遊百鍊竟不變千載存風流名節良  
足貴萬事真悠悠

豪士

東海一豪士西山兩逸民  
涕唾棄周粟談笑無秦軍  
餓死骨仍香辭封名益芬  
至今千載下不敢輕隱淪

雨後曉行

并序

曉景未炎宿雨新  
霽山容水色如在屏障間  
喻子以巾漉酒履不借手  
竹根如意從以樵  
青攜淵明子厚詩篇臨清流  
坐白石上蔭翠  
樾下數游儵詠南山之篇  
歌清池之章好風  
為我吹衣好雲為我娛目  
於是心恬形適抵

掌頓足而起舞曰人生為樂亦有過於此者  
乎樂而無詩如此景物何乃作五言一篇書  
之水葉云

宿雨曉初收長天澹如洗解帶臨清流泉聲細娛耳有  
如到愚溪還似遊栗里人生若此少貧賤非所恥

新浴

新浴換輕縠披襟臨榭臺好風知人意為我東南來晚  
池雨草青庶足充徘徊呼兒具綠樽聊進納涼杯一酌

暑氣消再酌愁懷開三爵竟酩酊浩歌臨蒼苔

苦熱不寐獨起對月

暑氣推不去涼風挽不來中庭月色淨攬衣起徘徊夜  
久萬籟寂秋近孤蛩哀月墮玉繩低此興真悠哉

秋暑熾甚忍飢偶作書季直弟以詩見嘲因次

韻

老夏雨既少穉秋雲亦無枯池罷桔槔薦花委芙蕖不  
粦漫藜藿不爨空樵蘇蘇州亦有言家人笑著書

中秋望月偶誦唐歐陽詹翫月詩追和一首

雲淨天既碧境幽月逾光  
未數鈿鉤潭不羨桂子堂  
霏香霧橫藹藹明輝揚  
冥搜興乍酣徙倚夜未央  
走兔望圓魄飛鳥喜新涼  
但知整綸巾何用翻霓裳  
芳尊聊自傾玉盤欲誰將  
美人何時來渺渺天一方

望所居西山瀑布

山居甚歡悰理策事遨嬉  
欽岑屬初霽眺覽得所宜  
懸崖有飛瀑注壑從涼颼  
濛濛噴霧雨冉冉含煙曦  
清冷

詎可汰駛激疇能陂會心欣有得徙倚不知疲雁蕩境  
千里香爐天一涯平生未能矚昏旦矧欲窺何如茲山  
溜若與幽人期他年營菟裘舍是將安之

月山諸峯

平生固寡好嗜石如奇章家無千金產昇致窮澗岡壽  
星來金華衣冠何昂藏屈肘據膝坐風雨須眉蒼松石  
產花溪奇詭頗異常鼻祖乃赤松素質侔白羊舞袖出  
煙霞

洞名

渾脫類大娘想當虞韶成率獸雜鳳踰觥觥石

柱峯孤峭仍軒昂長不滿五尺勢欲摩穹蒼獅子來何  
許俯首未騰驤何時一噴薄百獸走且僵鷗尾由天成  
畧不假斧斲端宜侈繪事詎止工厭禳東坡小仇池大  
筆流芬芳康公醉道士名篇粲煌煌矧我此數峯價重  
百琳琅願締金石交出處永不忘

近結茆屋數椽以可賦軒揭取子美可以賦新  
詩之義用沈約體賦詩一首

安仁偃息處之問讀書室茆軒規昔人聊可容吾膝幽



芳秀垣曲翠篠翦簷隙松窓炯虛明荆籬互疎密淡月  
曉窺几候蟲夕鳴壁詩書後前陳圖史左右秩遐覽到  
三五旁搜及堅白一語偶有得寸心欣自適輪奐非所  
慕茲焉頗放逸淵明儻來過真趣會能識

古風一首謝張漕子溫惠示詩卷

前輩久零落老成驚創見平生恥問津如今真北面曾  
中五色絲織此錦繡段見之心孔開照眼光爛爛我亦  
好吟詠忍飢說芻豢辛勤三十年功效無一綫偶茲得

大嚼味永不忍嚙嘉惠詎敢忘仁風敬揚扇

伏日陪府公侍御登四望亭分韻得四字

危亭壓層城是有佳致面面看江山水雲自相媚使  
君暇日登火老金正稗杯盤瑩無塵笑語清有味快風  
千里來暑氣三舍避賦詩紅蓮幕煎茶白衣吏詆諧想  
割肉搖扇笑疼臂

程曉伏日詩  
搖扇臂中疼

樂事古云少能并今有

四茲游峴山同千古知姓字吾輩亦何為雖駕猶附驥

葉自強讀書堂

退之宰陽山暇隙唯讀書同年大雅姿文史以為娛治  
劇逾整暇日與竹素俱頻首繙漢晉高聲誦唐虞不善  
吾所鑒善者吾所摹撐腸仍拄腹何翅五千餘似聞書  
帶草已復生庭除願言飽經濟舒之彌八區

獄空

公庭日將夕吏報空獄岸雖無春草鞠已有蛛絲蔓歡  
樂見鳥鳥呻吟絕鵝雁諒非片言折聊發一笑粲

同從兄季弟游香山追和東坡端午游諸寺韻

前車惟伯氏後乘載阿連相攜青蓮界共開白社筵黃  
梅雨初歇紅榴花正妍淨境聊莞爾妙興真悠然偈言  
溢四方經卷餘五千長廊含清風古潭搖蒼天幅巾既  
蕭散青鞋亦輕便登臨自晨曦談笑窮暮烟衡宇開卷  
坐僧房借榻眠却憶蘇州語喧靜兩皆禪

題張漕子溫貴希齋

新營老先生喜好一何異端能友造物直欲騎元氣古  
貨今難賣太羹元少味陽春誰肯和玄白人爭議知已

如晨星一笑聊自慰先民不云乎有以少為貴

由下梅至資福估賣官產

曉發下梅寺霽色浮壠麥崎嶇白楊岸詰屈黃牛旣野  
芳吐丰茸山羽鳴格磔驅車復前途聊欲徧阡陌

龍池寺

發軔資福山弭轡龍池寺杪春新雨足老紅圍穉翠溪  
流素穀寒山色青羅膩拄頰坐移晷此意誰能會

觀田家宴集

村落秋氣高涼颭泛林莽田家刈穫間斗酒勞良苦甕  
甌間竹箸殺雞仍具黍昏昏燈火照草草盃盤舉初喧  
鶯雁聲中靜兒女語醉來或田歌散去亦社舞不信五  
侯家軟盤薦肥羜

次韻周敏卿秋興三首

炎暑墮何許涼風忽吹衣野水映荒岸寒叢秀疎籬蕭  
蕭林影薄杳杳鴻聲悲秋禾亦既穫聊足充吾飢  
團團巖中桂移根籬舍間秋風一披拂嫋嫋天香寒對

此徑須飲把酒酬西山浩歌何窮已寧必素與蠻  
悠悠草根蟲鳴聲近我牀皎皎林間月亦已照我牆感  
此動萬慮聊復舉一觴何以侑我酒清嘯聞疎篁

星源縣齋書事

冬仲弭征轡歛焉及新春飽喫番陽飯細治星源民星  
源故自佳民俗良易馴不嫌聾丞愚翻愛假令真相與  
不忍欺見謂無溜磷牒訟日以簡賦輸日以臻遺我以  
暇隙使得窺典墳短檠一窓燈孤諷至夜分平明坐廳

事簾影清無塵閭里頗熙熙孰云民不淳顧謂汝父老  
辱愛亦已勤為我理歸櫂吾久思吾親

題圓通寺至樂亭次待制王公韻

地偏境自佳煙雲遶孤屋寒聲渺疎松翠影澹脩竹林  
深桂花晚微風度餘馥特用永歲年聊足媚幽獨

次韻侍御五月二十日閔雨

使君慕丘禱用志端不分天高聽甚卑深知使君勤立  
致楚東雨如開衡岳雲賴此苗盡活不然甦可焚



鷺湖寺

鷺王牧羣鷺濁世肯下遊積水近天關有時戲沈浮老  
禪天人師領畧傾九州初開選佛場坐斷諸峯頭當時  
江東西海納吞衆流歲晚徙山麓華堂跨龍樓至今韋  
公碑照曜蒼崖幽陳迹記往昔登臨縱冥搜重來歲月  
疾俯仰五十秋撫事一太息何從問人牛惟餘拱把木  
百尺環道周成壞各有時干戈今少休空懷三宿戀為  
爾半日留鐘聲遠送客霧雨昏林休

七峯亭獨坐

雨霽失炎燠新亭境清淑層波綠  
奔注疊嶂青陸續風簟韻絲桐煙柳開畫軸  
澹然塵慮銷庶足永曛旭

侍御王公去饒饒之士民數千萬人遮道攀轅  
又相與斷城北橋以留之公不得已乃回城從  
間道遁去餘干主簿翁君畫斷橋圖作詩二十  
韻寄侍御求和侍御以和篇見示因次韻一首

東嘉老先生文字繼坡谷治饒如京兆三王豈其族政

成無一事澹若處幽獨追蹤古循吏清淨非碌碌每以  
坐嘯餘時出陽春曲風流化邦人吟詠成國俗乙酉秋  
七月天地正炎燠有詔帥夔門引道不淹宿境內聞公  
行倉皇守牙纛攀轅人填咽遮道車擊轂已去復挽回  
出入成重複橋斷蜂腰分巷擁魚鱗蠹竟從間道去復  
許誰追遂子母若弟兄相顧皆嘖蹙吾父既往矣疇能  
繼英躅

公既行民皆相謂曰侍御往矣吾屬何所倚賴乎此予親聞之於和衆坊

孟嘗附商

船千古垂簡牘偷席廣文羶使者為標目去思聞九重

公乘教授小轎從間道去提點何公詩云朱轎偷席盛  
廣文擅公行之後饒民有錄此詩以狀聞於朝者

事傳西蜀先生美無度推誠置人腹畫圖照人間斯民

記恩育

欽定四庫全書

香山集卷二

宋 喻良能 撰

五言古詩

石鐘山

南北兩石鐘，上下一水側。造物妙鑄冶，蜚廉巧撞擊。鏜鏜仍噌吰，歌鐘與無射。豐山吾焉知，蒲牢爾何力。咨余久願遊，偶此事行役。時秋風颼颼，日暮水激激。初如鈞天鳴，乍若金奏寂。入耳粹而清，洗心欣以懌。怪竒有如此。

此遊覽誰能測發端示來今注經人姓鄺

題淵明醉石

平生憶淵明偶此訪遺跡柴桑僅未泯栗里猶可識寒溜澹泠泠孤煙輕冪冪撫事良多感西風生醉石

謁陶

淵明在彭澤到任八十日雖營三徑資未獲公田秣珍重千金腰不為督郵折拂衣賦歸來何異自投劾我生本樗散山林久蟠蛰雖非淵明儔頗亦慕幽迹偶然得

一第遂竊升斗秩未書藍田考已捧錦溪檄荒縣饒逋  
負催科費鞭扶彊顏簿領間忽復彌數月心焉媿淵明  
俯首三歎息番江何時還哦松聊自適

送呂憲帥維揚

讀我宋實錄元豐治明昌五年九月中上特開天章從  
容謂輔臣邊民疲可傷呂獨為朕言他人終未嘗已乃  
命正獻由定帥維揚學士加大稱庸以示寵光移鎮未  
去久趣歸總臺綱爾來九十年淮其踵遺芳我公嫡孫

行祖烈蔚載揚持節古閩粵攝事今福唐仁風雜和氣  
盎盎如春陽昘謠玉律響園扉春草長英聲飛九重御  
屏書益詳廣陵大都會經理須才良擁麾往鎮之非公  
諒誰當延閣陞寶書恩綸湛洋洋左符分淮海西顧寬  
巖廊想見入境初快覩爭星鳳折衝向樽俎宣威振金  
湯行看鋒車召衮衣侍虞皇賤子一何幸竊庇逾兩霜  
誤蒙剡薦牘名徹凝旒傍受恩未知報肝膽徒激昂唯  
祈轉洪鈞復立弟子行



偶題

少陵五十六負暄候樵牧我今年與齊而亦處幽獨小  
亭數椽淨新月半鉤曲聊將萬斛愁付與一盃綠

十月五日從兄四弟三姪侍太孺人賞菊亦好  
園以賞心樂事為韻分得賞字

霜天豁澄明水日共清朗西園足甘菊歡言事幽賞板  
輿奉慈顏華髮森少長一笑喜團藥千枝迷俯仰黃英  
浥露繁翠蔓緣籬上雄蜂與雌蝶採擷紛還往逸興既

中酣佳致仍外獎未多彭澤賢不羨天隨廣憶昔吏江  
東王事困鞅掌及今處閭里暇日娛塏爽穀酒雖不豐  
獻酬非或強分韻先阿連作詩真技癢

閔中堂

危簷覆虛明景趣清且長曲池散漣漪珍木含葱蒼離  
離荔子丹冉冉茉莉香有堂既足佳無羶庸何傷

次韻提舉王正言寒食游茶焙

摘山勝煮海財貨所源流建焙甲天下賦入十倍收國

計頗賴之貢輸何時休擇人為提領得賢從宛丘文章  
脫吏腕風味登瀛洲佐職亦已久再見春草抽郊原富  
槍旗歲事日以修撫民端若子疾惡信如讐驅車向鳳  
山父老觀道周青春行畫圖佳處時一留風前耳潺湲  
雨後目纖柔酒酣已勝賞珠唾揮釣釣咨予素么麼受  
恩猶未酬銘心雖甚堅撫已徒懷羞平生困坎壈暮年  
尚依劉投公一紙書遠寄粵王州書傳得妙帖想像寒  
食游終防好事人豪奪或巧偷

題紅雲島

紅雲覆絕島望之心神開弱水不負舟何由至蓬萊吾  
欲煩巨鼇為載三山來不然騎鯨去一醉流霞杯

予去歲五月由浙入閩見夾道長松黛色參天  
行者均被其蔭間有為斧斤所戕者缺而不補  
十步一歎顧恨方為校官非所職掌不得以封  
殖培壅之事告之部使者懷不滿之意彌年於  
茲矣比竊聞提刑承宣命尉曹若僧徒封殖其

有而補其所亡期使道路之人行千里若宇下  
而無病暍苦熱之歎其為全閩無窮之惠厚矣  
予自少喜讀柳子厚詩見其稱商山臨路有孤  
松往來每斫以為明好事者憐之編竹成援遂  
其生植感而賦詩中有幸逢仁惠意重此藩籬  
護之句每愛而誦習之今輒追次其韻以紀一  
時之盛亦古今甘棠之意也雖言詞不工蓋欲  
自附於國風之末庶幾他日採詩之官或有取

馬

鬱鬱千丈松誰栽蔭脩路年紀寢綿邈斧斤時謬誤皇  
華重憐惻霜根辱調護他日比甘棠流風繼行露

夜宿天章寺

蘭亭負崇岡脩竹翳寒綠囂煩隔人境爽氣森佛屋薄  
暮行役罷言就上方宿是時秋崢嶸西風響巖谷越蘭  
不可見浩歌想餘馥右軍恨何許襖序空三復夜久百  
蟲絕燈花媚幽獨蕭然四壁靜一洗塵萬斛何當脫羈

軟陰巖事卜築聊復得此遊澹然心賞足

華峯亭

華峯抱紫翠茲亭瞰清幽春林羅畫屏新月吐玉鉤宛  
如東屯居恍若南澗游信美吾亦樂特用慰淹留

己亥中秋

二七月皎皎三五雲沈沈終然露半壁亦復牽孤吟夜  
久羣動息唯有寒蛩音長年重節序感慨非獨今

勿言魯酒薄為史端叔作也端叔同寮於越未

終更求奉中都祠歸丞相侍傍作是詩以送之  
同寮雖云多交友未易結臭味一小異肝膽便楚越君  
侯宰相子風度何翩翩四偕計吏貢春銓復袞然一見  
蓋為傾相逢豈在早白髮與紅顏論交非草草君才若  
杞梓真能世其家顧我如駑駘祇堪服鹽車心情過中  
年何翅數日惡徑須釀一樽勿言魯酒薄

大雪追和退之辛卯年雪韻

太皞亦已至元冥猶未歸茫茫天壤間浪闊銀山圍玉



龍橫梅度皓鶴漫空飛白帝有所適飄飄揚旌旂從者  
一何繁縞席仍練衣招邀姑射仙逢迎廣寒妃祥耶時  
令耶疇能測天機飢人凍欲死賞玩理則非安得萬裘  
褐寒者或庶幾願言均此惠不知身賤微

次韻奉酬刑部王嘉叟侍郎書戲綵集後

制作參易經不用草玄準眼空天壤間誰得並捷敏鴻  
文翻水就未省苦吟吟齊梁逮陳隋衆作付一哂南國  
容本冶西子髮更鬢混然真天成寧復分域畛飛上青

雲端秋空擊鷹隼豈唯持荷橐已復班玉笋雖未究所  
長要亦攄素蘊大手秉綸綍至音發簾簾嗟予墮詩窮  
政坐無鉛粉數竒祗自憐多忤誰汲引有賦難逐貧無  
詩不招隱明公獨深憐不嫌邊幅窘謂雖敝帚如或可  
充貢箇恃此以無恐枚舉窮久忍儻復念管蒯庶免辱  
荆槿

次韻宗郎中師仁見示古風

平生癖於詩業債餘清淨但已心孔開敢誇筆鋒勁疾

書或歌斜所向必雅正顧慚非晉人出語那韻勝亦好  
三畝園松竹互掩映門闌雖間啟俗客未省迎豈唯愜  
幽情頗復動詩興竭來古泮宮未諳麋鹿性何處更有  
詩抗走足不定宗英出大篇重此綠綺贈未應費推敲  
詎止工競病此作不為妙妙處知難更吟壇將風雅瑣  
尾宜退聽賀白真雁行離騷可奴命熟復句中眼如對  
麋尾柄迷途獲指南從此識畦徑自應形贊歎誰復獻  
嘲評佳處未易知當有識者證

送高炳如倅天台

高侯吾所畏學問覩壺與秋水瑩精神春華麗詞藻三  
館竭來游兩鬢青未皓何心翫歲月刻意事探討二志  
既崇成八書可偕攷烏臺好風采綸闈須典誥引疾遽  
有祈勇退一何早丹丘非大名泥軾僅小好會看有詔  
追豈必俟身到行矣即輕安愷悌神所勞

張持荷示詩編次韻一篇為謝

先唐詩道昌萬象繞吟筆長吉窮嶮怪奚囊銷永日一

洗齊梁陋古澹見摩詰詰齋妙入神二者無一失遊戲  
唾成珠所至動盈帙長篇雜短詠朱絃響玉律脫身聲  
利場宴坐心更逸高眠聽松聲清話剥芡實聲名笑山  
王任達景嵇畢時發孤鳳鳴不作寒蛩唧人譏雕肺肝  
悠然非所恤編成客未佳櫝藏謹勿出

王丞相生辰

皇宋十一葉時清風俗淳實維元首明亦繫股肱純煌  
煌冀國公自昔抱經綸初掌黃麻詰黼黻同卿雲繼處

宥密地五兵驅精神一品坐黃扉十載轉洪鈞雍容陪  
都俞黽勉承華勛鏡淨滄海波煙銷紫塞塵伊傳堪並  
驅蕭曹真下陳桑兆歲若午協洽寅在辰入夢一玉燕  
持鑪兩天人二十四書考八千歲為春西湖為酒醴南  
屏為膳珍萬口均一詞共祝柱石臣一祝錫難老再祝  
長同寅百祝配遼鶴千祝如大椿國壽箕翼齊洎公永  
無垠貴名與鴻烈日新日日新

次韻奉酬趙景明法曹見贈

宗英賀白儔肯從野人遊相見各失喜胡為俱皇州孤  
燈照清談新詩澹牢愁明日却分袂獨往濤江頭

齋宿昭慶院祀南嶽南海

秉檄奉中祀驅車出重關曉風鐵葉嶺煙雨南屏山淪  
茗澡塵慮褰簾飮孱顏精意孚海嶽清聲搖珮環

留別直院莫子齋少卿

鬱鬱千丈松植根在崇岡清陰亘十畝直幹凌霄蒼好  
風一披拂聲韻諧宮商古來成大厦此物宜棟梁不待

歲月久共看柱明堂微木有石楠枯崖飽風霜三百甲  
子餘圍纔拱把强大楹分難充一桶庶可當儻容附松  
末雖晚庸何傷

留別王嘉叟檢正

初寮久已往今誰主文盟王公有嫡孫見者服且驚  
胃中九雲夢筆端三折肱招致道山中掉頭不肯磨  
論事常山蛇持身玉壺水平生謝先容要津真自登  
四海望霖雨一人須股肱我本田家子蹉跎將暮齡  
相逢豈在



早一見蓋已傾謂我雖禿犀敝帚亦足稱持獻先簞筍  
長篇有明徵公乎儻踐言庶為老親榮

送參議林郎中

人孰不識面相知貴知心唯我與夫子傾蓋成斷金疇  
昔居京邑庀職偶相臨肯紆鍾期聰俯聽牙弦琴講說  
三百篇一一蒙賞音竭來鍾山旁休沐同搜吟聯鑣照  
湖側攜手天衣岑飛鳴互嚶嚶和樂長惜惜無詩不屬  
和有酒相與斟餉我破羌帖佳妙同來禽復遺先聖像

摹寫自孔林二年如巨蚤一旦辰與參襟期自茲遠詩  
盟幾時尋願言蚤盡簪無為徒滯淫

游鹿田三洞

東西兩鹿田上下三洞天苔徑劣容足石門低及肩乳  
竇斷還滴天窓皓仍玄何當出樊籠悠哉聊永年

次韻鞏憲見示桐栢瀑布之作

昔聞孫興公嘗賦飛流水至今福庭地猶屬羽人里瀑  
泉天半來界道見清泚迢迢白虹貫隱隱玉龍起宇宙

雖云寬壯觀，知能幾谷簾。信有之界圖，寧辨此清秋。饒  
爽氣，朱夏絕埃滓。何當振金策，逍遙山之趾。眺覽既愜  
適，嘯歌何窮已。青鞋未成往，撫已空自鄙。

月橋詩

天迥月逾晶，地偏人亦靜。蕭然尋丈橋，寄此綠淨境。洗  
盞薦寒光，掬泉弄清影。塵遠耳目醒，令人發深省。

約季野九日登雲黃不果季野有詩因次韻

青山如候蟲，可賞不可應。胡為謝康樂，遊覽乃欲徧縱。

登最高頂過眼猶掣電何如菊花天周遶籬落畔對面  
黃雲峯未妨籬下見相攜凌紫霞更約東風便

送晏伯安

古綢於今嫠蓋亦一壯縣劇繁號難理百令無一健英  
英晏伯安年壯政則練咄嗟掃宿弊談笑了宿案公庭  
坐無事自可名道院老眼空四海於公驚創見今公賦  
歸歟敢以一語餞邊陲正驛騷朝野未聞燕公才浩縱  
橫敵可受八面要須詣明光上書還自薦口伐或箸籌

收功在不戰不然飛芻粟坐使軍儲羨

次韻伯壽兄殘春即事

屏居事幽潛親故成久別茅簷翳濃綠醪醑隨香雪山  
氣清涼國溪聲廣長舌但須賢人酒安用長者轍吟腸  
繞碧雲醉臉暈紅纈奴耕穀可憇兒書筆難掣地偏塵  
不到心境兩清絕嘯歌何窮已未覺處身拙

為何監獄題種德堂

作堂備登覽既作扁其顏扁顏固云易踐名良獨難我

友何水曹築堂水雲間  
瞰臨擅奇絕佳氣何鬱盤橫以  
數畝池繚以四面山  
石楠間女貞青士依蒼官紛紛雜  
花卉栽植日以繁  
豈獨秀春融未應凋歲寒  
凭欄試游目皎皎萬慮寬  
張公江海客一見顏為歡  
嘉名揭種德寓意固有存  
期君宴游日內照時返觀  
善性益培壅蕪累須一刪  
木老德亦熟無忘老坡言

何茂宏茂恭攜酒見過復侑以詩次韻一首

薄雲漏朝曦積雨霽中夏  
白波涵磬湖清影漾  
茆舍輪

蹄絕還往文史富閒暇畏友有機雲英標凜王謝喜尋  
范張約偕命嵇呂駕豈徒貴密邇聊亦重姻婭戲彩膝  
纔容亦好草可藉瓦盆薦谿毛竹箸羞雞炙劇談掌屢  
抵糲食咽亦下晚涼過古刹明月耀脩架蒲團語上方  
篝火耿良夜凌晨一瘦藤支徑雙不借長嘯陟雲嶺清  
吟探石罅嶽岑近明目湍激深沒胯別袂余力摻歸鞍  
子傭跨何時許重臨倒屣肅邀迓

謝葉致政送芍藥

佳葩如美人豔態妖且閒葉園美無度有花字雌丹晨  
粧謝膏沐秀色若可餐芳根裏春泥舉贈不作難鞦韆  
照池亭一洗儒生酸從今杜陵眼不復嗟長寒何以報  
嘉惠作詩當琅玕

秋曉野步

案此詩據南宋  
名賢小集增入

幽居邇郊原出戶目已瞭閒攜一枝竹散步及秋曉寒  
烟引輕雲澹澹縈木杪矯首矚層穹轉盼失飛鳥野潦  
淨荒陂驚颿泛枯篠世態徒營營此心殊了了佳處誰



與論聊用付清醪

|  |  |  |  |  |  |  |  |
|--|--|--|--|--|--|--|--|
|  |  |  |  |  |  |  |  |
|--|--|--|--|--|--|--|--|

欽定四庫全書

香山集卷三

宋 喻良能 撰

七言古詩

次韻伯壽兄海棠

無情長笑杜陵老不識海棠春意好東坡作意賞東風  
為愛輕綃映肉紅枝頭點綴知多少貪睡今年開不早  
含情欲開還未開紫蝶黃蜂亦懶回可憐熟視明人目  
長恨年年看不足曉來風定雨霏霏減却春光一片飛

多愁更被花相惱  
寧惜春衫同藉草

潘淑妃

東昏當日寵容華  
潘妃步步生蓮花  
閱武堂前種楊柳  
玉兒雪腕親沽酒  
蓮花不見楊柳空  
蒼烟白露雜悲風

張麗華

張家女兒號麗華  
十歲選入君王家  
君王一見念玉雪  
喚作後庭瓊樹花  
臨風結綺香風度  
自謂朝朝兼暮暮  
那知夢斷金井欄  
往事茫茫墮煙霧

廣信試院追和東坡催試官考校韻

深院鎖涼秋西風坐間好  
几淨窓明塵不飛似躡紅雲  
至三島數枝淡淡桂新香  
千帶垂垂柳初老此邦天下  
秀多士鄒魯無負薪或解談  
王道被褐無非懷璧夫五  
兵奪目庫觀武大嚼快意門  
過屠誰言拔才古難必披  
沙求金要須得回思裹飯然  
脂燭一心敢擬思鴻鵠

吉老手刃凶人為母報仇詩以紀之

卧水叱馭全忠孝王氏多賢  
今古同公乎孝行驚創見

落落豈特漢晉風凶人夜半發丘隴敢爾殘暴不畏公  
古來刃讐不共天痛貫肝膂何時窮剗心設祭久自許  
何況臨機敢不武拔刀斷賊血糝糊袍笏雍容詣官府  
忍恥貪生真可羞退之諄諄言復讐請衣一擊當報怨  
豫子猶能致嘉傳如公壯志今已伸他日定為忠義臣  
行看氣節動天子詔書一洗泉下恥

木狀元惠示近詩一卷作詩為謝

洪都通守詞華溢漢殿文章元第一萬卷落落蟠胸中

三江袞袞懸吟筆贈我玉佩聯玦環未數大鵬兼小山  
欲知風味不能盡此卷長留天地間

向伯章通判請賦畫扇

晴天萬頃浮烟水小艇鳴榔烟水裏一聲欸乃西風起  
滿輪明月蓼花秋富貴於我真浮漚世間何事不悠悠  
為周提宮題尚友堂

先生高節作流俗未應名宦能羈束歸來卜築傍泉石  
灑落軒楹照山谷外羅君子六千人中有挿架三萬軸

我嘗一日坐其間至今清興猶堪掬

題晚節香亭

周侯人中英為文若翻水苦節凌雪霜香名馥蘭芷考  
槃在幽谷篁竹富清美竹邊兩桂樹碧葉光疑疑扁堂  
曰節香欲以規紫履竹桂日以茂紫履日以修一觴一

詠知未稱願續離騷賦遠遊

離騷經曰依前聖以節中  
又曰離申椒與菌桂遠遊

曰舒并節以馳驚又  
曰麗桂樹之冬榮

丫頭巖



自有宇宙有此山萬八千歲須臾間亭亭造天屹石壁  
雨淋日爍逾堅頑且無泉瀑美裙悅肯以草木媚容顏  
丫頭得名良未稱那有巨手梳髻鬟會當呼作陸砥柱  
長與義娥閱往還

侍御宴僚屬于番江樓以卧病不克與分韻得  
四字

使君自是廊廟器五馬一麾聊爾耳今年清淨獄既空  
去歲豐登米不貴郡中九賢政可十京兆三王何足四

乘閒領客宴江閣對景題詩忘肉味坐間僚屬總文采  
筆下波瀾更源委夏木陰陰啼鳥喧烟波渺渺輕帆駛  
錯落觥籌畧達尊從容笑語窮幽意嗟予薄命捩翻羹  
卧病空齋吟擁鼻畫戟凝香不同賦白衣送酒猶霑醉  
追攀逸韻苦無才想像清歡欲生翅蘭亭被罰定非佳  
金谷望塵吁可媿他年江左仰遺風應有畫圖傳盛事

題楞伽寺李公山房藏書閣

小閣崢嶸在空谷云是先生讀書屋不見善和數千卷

空聞鄴侯三萬軸先生一去幾經年山色依然為誰綠  
只今賴有衛夫人壁上蕭蕭數竿竹

春晚遣興

乳鴨池塘春水滿秋千院落東風暖簾間燕子語雖忙  
葉底黃鸝啼更緩長大何如年少時雕鞍駿馬踏芳菲  
閉門不覺庭花落顛倒殘紅作地衣

次韻王侍郎寄題亦好園

磬湖鷗鷺自相親湖邊山園步步新魚鳥細看自足樂

芋栗可收猶未貧我覺有園貧亦好人笑此園何太小  
他年便擬當菟裘不羨尊鱸歸計早

種菊

子猷借宅亦種竹淵明荒徑猶存菊九日黃英凜碎金  
三冬翠幹森寒玉亦好纔園一畝寬恨無九畹養芳蘭  
聊種寒花一百本要伴此君秋後看

僕坐釣磯李野弟寄詩來因次韻

湖岸柳根半歌側柳邊仍有陂陀石不因斧鑿成漁磯

燕坐未妨釣餌垂  
磬湖寧待他山錯  
白波分影涵翠幄  
翠幄陰中千結藤  
對面好山羅畫屏  
遙岑無雲明入眼  
遣我爛如巖下電  
平生不憂臭於銅  
俗氛安能蔽重重  
興來散策飢來食  
起居無時惟其適  
詩窮吾師杜少陵  
一杯未用身後名  
他年掛冠不待老  
歸來從君乞身早

新居成茂恭以詩見賀次韻奉酬

子美堂工始上元  
斷手乃在寶應年  
顧我無能為杜役  
有此屋廬差不難  
欲移脩竹梅花亞  
暮靄朝烟迷上下

室遠地偏來者誰時有相思稽老駕平生願足不願餘  
底用虛名更著書雖無挂腹五千卷且有山陽宅一區  
海內長句君最好辱致新篇為善禱雞豚社酒幸不遠  
來往他年成二老

蚊

慢膚秋來困撲緣手不勝拍身聽旃昨夜嚙颺愜人意  
一掃天宇何澄鮮蚊子蚊孫與蚋伯飛鳴適意須明年

題葉省幹見示詩卷次韻一篇

微官詎足施才具每向閒中有佳句要同秦系下長城  
却笑屈原無聖處穿天出月摘清芬煎膠續絃唯有君  
命題探韻儕輩分昂昂野鶴在雞羣綠髮才名今白首  
未數憑虛與烏有會當載酒擘鸞牋共試吟邊三昧手

葉少有閒傍蒼苔數落花之句為汪彥章所稱

謝君植矮梅百許株蟠屈如輪臘至皆著花灑  
灑可愛

孤竹低回首陽下許由偃蹇箕山巔謝君雅有林泉趣

種得江梅如二賢  
南州臘月溫和早  
賴有冰花除熱惱  
鱗差百樹夾徑明  
似過山陰雪中道

試院一首

南國諸侯老賓客  
霜葉青衫頭雪白  
繡衣使者急搜賢  
又向文場三捧檄  
全閩多士如鄧林  
大廈度材慚匠石  
細看太白日萬言  
時取武成二三策  
清心期識璞三獻  
過眼敢迷目五色  
只今雖無衣鉢傳  
向來未省原天覓  
更長寧辭燭屢秉  
漏下何啻夜十刻  
回思前日踏槐花



忍使青袍輕飲墨

余同年由試院積俸給買馬而歸中路幾逸戲  
作長句贈之

知君幾作東野畢瘦馬田間風欲逸  
圉人白汗似翻珠  
暫爾奔騰未為失歸家須辦紫游韁  
玉轡紅纓搖鬬裝  
一鞭嘶風映垂楊要試寧川春草長

安撫開府史丞相誕辰

一年好處橘初綠雨後秋容淨如沐  
潭潭大府忠孝家

黃堂正奏千秋曲揮毫落紙妙卿雲千佛經中蚤致身  
橫飛直上九萬里金魚玉帶真天人籌邊利國知誰似  
直節長才堪重寄手扶杲日照乾坤力轉洪鈞陶品彙  
橐龔戟纛粲煌煌紫極聯休袞繡光暫向閩都分帥閫  
再歸天闕致時康鰥生才業等鞭線昔辱甄收今論薦  
喜看太白應長庚樂頌燕公符玉燕舊聞莊叟說大椿  
八千為秋八千春願將眉壽同長久永作王家柱石臣  
參議李郎中惠示古律詩兩巨軸次韻首篇奉

酬

鄴中七雄迹既掃謝樓夢斷池塘草仙李詩人麻竹多  
佳句唯傳杜陵老省郎句法專後來歷盡今世詩流才

并刀翦水有佳致月中聚雪無纖埃穿天出月餘四紀

來詩有宣和中作故云

捉月風流今不死從教人售一杯水自信

筆挾風霜字次山風味喚仍回老文猶未磨蒼崖收拾  
明珠百餘斛寒光入夜闔復開我得公詩興嘆慨千古  
長留詩卷在祇恐天官下取將人間古貨今難賣

八月十五夜翫月

前年磬湖新雨歇，獨繞湖邊待明月。  
夜深雲散月華來，疑是山陰踏晴雪。  
去年鎖宿校羣英，冰娥於人亦有情。  
仰看一鏡綠雲上，俯聽春蠶食葉聲。  
今年廣文在官舍，亦復開樽臨月榭。  
慈顏一笑綵衣輕，誰云官冷孤清夜。  
酒闌月色更徘徊，捲簾開戶真佳哉。  
懸知明年應更好，扁舟正泊雙溪隈。

予由中都還至暨陽道中聞禽鳴云明朝早起

挿田作詩識之

溝塍雨新足，穠稔秧正綠。林間鳥聲喧，明朝起挿田。明朝挿田起，須蚤謝汝殷勤。畦稻禽聲禽聲亦不惡，大勝人歌金縷曲。

送劉孟冶司令之官四明

先生行孝人，莫攀平生急。祿怡親顏三千曲，禮髮已白七十老。萊衣尚斑，秋容新沐。江涵天濶，輿低昂御花間。憑誰為喚吳道子，一寫畫圖連越山。

若耶曲

若耶溪上涼如許五月清風不知暑  
半空濃翠接蒼烟滿眼輕陰覺疎雨  
織女潭邊深復深繞門山畔石成林  
紅粧蕩漿誰家女笑入荷花無處尋

點檢朝陵內人頓遞至西興道中紀事

平湖瀲灩搖春風扁舟輕駛如飛鴻  
垂楊萬縷長青茸倚岸崇桃醉臉紅  
滿空烟雨霏濛濛柯橋精廬聞午鐘  
平疇麥苗青芄芄崇峯秀岑紛紛瓏圖經未看名巨窮

雨葩烟葉交朦朧吾欲圖之誰其功妙語却思六一翁  
解道山色有無中薄暮艤舟依竹叢夜深點滴聽孤蓬  
天明利涉浮梁雄錢清雖小炊烟重我生之辰今適逢  
一杯不暇緣匆匆聊以新詩娛老悰龕山西北水溶溶  
白鶴橋邊小梵宮海天茫茫空復空放眸一望日本東  
蕭山小邑河陽同桃李漫山如錦幘谿旁驛亭名夢筆  
故居知是江文通西興浦口天連水滿眼長安紫翠濃  
四月二十九日坐直廬讀山谷效東坡作薄薄

酒二章慨然有感追賦一首

薄薄酒勝獨醒醜醜婦勝鰥癯笙歌鼎沸不須羨松風  
滿耳自足聽前遮後擁未必樂邀月對影堪娛情晚食  
有味可當肉衡宇無災勝列屋魯東門外聽鐘鼓齊宣  
堂下狀殼赫何如巢林一枝飲河滿腹水磴多至三十  
具胡椒滿貯八百斛何如濁酒一杯彈琴一曲子平為  
富不如貧子方稱賤能驕人高明之家鬼可瞰網射納  
稅官不嗔中山醇醪醉千日文君遠山致消渴不如茹



柴百錢可一斗荆釵白頭長相守

次韻王侍制讀東坡詩兼述韓歐之美一首

文章端與時高下列國有風周有雅建安氣質混不傷  
齊梁紛紛堪斗量先唐詩人子韓子落筆洗空千古士  
篇章杼軸自己出正派猶能傳六一作詩餘事真詩仙  
騎麟被髮何翩然韻寬泛押入傍近窄韻宜搜期押盡  
鈎章棘句未多郊古諷新題寧數稔五季詩流喜穿鑿  
蟬噪蛙鳴嗟衆作皇朝天人歐與蘇星鳳初見人驚呼

醉翁句法到勝處紆餘條暢今古無鋪張揚厲詞藻捩  
雅稱金泥兼玉檢一篇妙絕廬山高幾首清新寫鬱陶  
造化機緘富狀彙豈獨文星南斗避如何妄評味短長  
自古羣兒喜嘲議雪堂羈窮如牧之得非天欲昌其詩  
平生古律三千首無媿清風白雪詞才如太白更無敵  
丈似子長兼愛竒江西宗派不足進自鄮以下曾無譏  
流傳海內皆珠玉到處逢人俱願學不須酬唱說西崑  
宋有歐蘇唐有韓二丈

謂文公  
文忠也

邈乎其杖几一編且誦

蘇夫子

古風一首奉送淳叟太博通守豫章

劉侯精神秋隼緊高論懸河傾不盡至尊動色嗟諤諤  
權倖切齒畏謇謇致君未覺賈誼疎濟時尚嫌馬周窘  
三年博士向見治萬卷蟠胸一何敏歛然大起故鄉思  
自請題輿佐旗隼笑指江城欲載馳輕棄班列誰能挽  
羨君去騎日駸駸顧我朝行猶蠢蠢語離寧憚十觴連  
惜別不知雙淚隕贈言見意乏珠玉作詩餞行少鉛粉

從今數日待君歸握手修門未為晚

都丞李侍郎叔永和子小園二十六詩因成古

風一首奉謝

黃昏兀坐對疎竹歛有寒光臨蔀屋焚香發軸得新詩  
炯炯驪珠二十六三唐妙音久已斷輞川麗藻今能續  
報瓜何必枉瓊華抵鵲奚須費明玉韓豪蘇仙吁可畏  
白俗元輕何足錄從此磬湖三畝園絕勝李愿一盤谷

都丞侍郎再和屋宇韻詩次韻奉酬

小園五畝依篁竹中有茆茨數椽屋小橋度水既窈窕  
側徑穿花仍曲六慣看翠碧羽差池時聽黃鸝聲斷續  
詩成持鼓過雷門誰信拋磚能引玉長篇麗句為藩飾  
小草么花蒙著錄懸知家世以詩鳴壓倒平泉與昌谷

李侍郎三和屋宇詩次韻為謝

衛武文章比淇竹閑閣著書欣仰屋胸蟠載籍餘萬卷  
為家五百九十六詞華爾雅騷可奴議論淵源經可續  
筆端凜凜挾風霜齒頰泠泠漱冰玉久知廣大端可法

自顧么微何足錄願同湛輩附羊公庶比江西派山谷  
何司業和屋宇詩見詒次韻奉酬

亦好園林富松竹愛山堂上書連屋恨無妙語為題品  
空對竒峯有十六先生佳句落泉石杜詩韓筆端能續  
有如妙響發朱絃恰似清音動寒玉須知小圃辱提撕  
何異寒門被收錄從今草木有光輝盎盎春溫入鄒谷  
寄湖口劉少魏主簿求皂湖石

平生愛石似竒章老矣一拳猶未致夜來夢繞太湖側

萬玉嶙峋清有味夢回身復落紅塵聞道皂湖山可人  
幸致一峯為我壽為君作詩傳不朽

伯琬明府年兄和予致宇韻詩舉英石見遺謹  
次來韻以報盛貺

久聞英石空流涎意欲得之無力致士衡東頭富玲瓏  
染指獨許嘗鼎味明窓淨几拂蛛塵尤物定自能移人  
報惠慚無百金壽贈公相好無時朽

公家一峯如終南須信是中有佳致對之忘飢亦忘愁

豈待聲色薰臭味嗜好蕭然迥出塵同年要是我輩人  
世間何物如石壽墨妙與之俱不朽

周希稷見示詩卷作詩為謝


周郎列宿胸中羅筆端有口如懸河贈我明珠六十八  
一一照乘圓無頗我學穀梁失也短君才士衡惠其多  
中興功業要紀述浯溪石崖當往磨

次韻楊廷秀浯花圖歌

詩翁銜袖出清詩醉墨淋漓驚乍寫明珠炯炯照戶牖



恍疑驪龍睡遺者彌明高唱詩云云此翁一掃如飛蚊  
詩狂克念酒作聖樽前笑殺劉師命李白張旭稱世賢  
姓名優入少陵編平生我亦忝詞客自得此詩輕尺璧  
他年別去長相憶





欽定四庫全書

集部

香山集卷六

四至

詳校官庶吉士臣翁樹培

主事臣呂雲棟覆勘

膠錄副貢生臣杭光晉

膠錄監生臣溫廷鑑

欽定四庫全書

香山集卷四

宋 喻良能 撰

七言古詩

王樞使生辰

金華千古赤松宅中有初平叱羊石雙溪袞袞瀉蒼波  
三洞潭潭接天碧鍾英孕粹昂星精文章蚤歲瑞王廷  
橫飛直上九萬里紅顏兩鬢何青青金鑾疇昔揮毫處  
嘗草尺書招贊普職親孰聽玉宸鐘夜分更秉金蓮炬

只今右府冠樞衡坐運精神驅五兵一烽莫覩狼烟燧  
四海不聞金革聲蒼生顓顓待霖雨黃屋便蕃頌異數  
姓名久已覆金甌東街行築沙堤路江左夷吾望更尊  
二十四考何足論已見威棱動蠻貊會看勲業照乾坤  
六十門生焚蕙炷再拜祝公如衛武柱石皇家不計年  
長容礪質入陶甄

題旌忠廟次王龜齡韻

睢陽截然當賊中嬰城既久糧食空矢死不降有二公

青史皎皎書其忠國家涵養自建隆上至鵷鷺下羆熊  
一節一義皆獲通無不昭然簡宸衷建炎多難誰奮躬  
開門納降何匆匆達官尚爾況困窮嗟嗟唐侯一何雄  
抽軀擊敵甘命終願以頸血汚刃紅精誠貫日亘雲穹  
上徹九重達堯聰詔令血食居鎮東激昂臣子忠勇風  
嘉名千古齊華崧王仙作詩美抗戎豈比爾雅詒魚蟲  
次韻王龜齡侍御不欺室

與玄雖非童九齡向來亦既許攀鱗從容撰屢飽言論

我知公直社稷臣此心炯炯貫白日何止不欺尋丈室  
霜臺白簡凜乘驄史館誅姦森直筆紫巖先生子張子  
百世一人嗟已死室中八十四驪珠千載流芳同信史

魏國張公作不欺  
室銘凡八十四字

飲餞王共父分韻得轉字

子猷風味最諸王墨妙文工眼如電慣吟疎雨滴梧桐  
解道澄江淨如練去年落筆中書堂姓名高徹蓬萊殿  
至尊動色催除目俾向蘭臺參俊彥要成遠業待時須

故遣讀書破萬卷夫何歸思動岷峨自請題輿近鄉縣  
學省諸公悵別離擊鮮載酒開芳燕欲澆胸次數日惡  
剩作林亭百壺餞落花送酒舞繽紛亂絮催詩飛肱轉  
臨歧那用賦銷魂但要修門重會面

題愍孝廟次王龜齡韻

曹娥卓行傳豐碑越人往往貴女兒建炎蔡氏有孝子  
事比孝子尤瓌奇自從結髮讀書史倜儻不受勒與羈  
迺翁註誤落囹圄疚心疾首泣以悲胡能安坐視父繫



朝暮哀訴當旌麾府公儻許贖父罪名隸卒伍所不辭  
不然奮身事征討赴勇力猶可施黃堂沈深身則微  
雖有誠懇無人知歸來靜默心語口此事感悟當以屍  
臨河勇決不復顧純孝寧不由天資緹縈上書解刑網  
言雖迫切身無虧文本理寃由一賦孰與捐命如含飴  
殺身成仁古所罕殆類餓踣齊與夷事聞黃屋亦動色  
亟詔立祠河水湄嗟嗟元應固不朽萬口至今皆一詞  
東嘉夫子好事者作歌登載仍吁嘻異時國史編宋雅

人間重見白華詩

二月二十四日楊廷秀郎中諸友約遊西湖余  
以小疾不至分韻得子字

都城西頭二月尾湖水平堤縠紋起南北山光罨畫中  
淺深草色裙腰裏羣仙領客泛舸舳黃帽劈波驚鱸鯉  
中流劇談聞兩岸闔坐題詩動盈紙如漚自足醉朋從  
餘瀝猶能霑走史當年曲水迹已陳此日漢陂歡莫擬  
塞予小疾獨不至詩伯索詩殊未已筆已老矣何能為

但誦西湖比西子

王丞相生辰

金華千仞摩穹蒼雙溪迢迢碧流長清淑之氣從風翔  
霜縑霧縠不足當真賢挺生金玉相上擢屈豔薰班香  
疇昔視草居明光鴻文大冊歷常楊既陞紫樞兵氣揚  
運籌決勝如子房鴻鈞一氣轉混茫相吉崇璟何足方  
直與夔龍為雁行烟火萬里俱耕桑冠帶百蠻走梯航  
玉皇案前勤贊襄坐令我宋如虞唐中書事業殊未央

二十四考嗤汾陽北堂西母壽而康榮封大國富井疆  
錦衣命服粲煌煌麻姑一半鬢未霜亭亭玉樹階蘭芳  
徽猷凝操書道昌向來王謝今祇王十倍江左浩莫量  
四海同詞祝壽觴願公壽比赤松強永作一柱扶明堂

次韻王龜齡狀元西湖賞梅

乘閒選勝真悠哉正見千樹冰花開天寒日暮湖面淨  
疎影著水清無埃杏桃畏寒不敢吐春榜占作羣花魁  
廣平無人何遜死睥睨欲賦嗟無才東嘉夫子一何妙

筆端游戲成瓊瑰繁英麗句鬪清好不用白鷺雙飛來  
要令奚囊出佳什故遣漁唱傳清杯西湖處士骨雖槁  
一喚暗香風味回

次韻逢使君寺丞見贈

冰花零亂飛庭戶夜色晶瑩似三五詩仙曉贈白雪篇  
便覺清風追吉甫區區五斗不知疲故園應有北山移  
凍冷不暇搜佳句千里歸心到鄉樹

贈神童林公滋公澤女神童幼玉

一英二孺同一家  
衮衮誦書幾五車  
語音姪姪春簾燕  
稚齒清便蘭砌芽  
聯茵並載驚都市  
萬里青雲從此始  
兩駒應佩金削刀  
雙鬟會作女博士

魏志甄后傳后幼喜書數用諸兄筆

硯兄為后言汝當習女工用書為學當作女博士耶

二月二十一日何司業集客于張園玉牒給事

命予賦詩紫微舍人左史舍人亦以見委因成

七言十韻一首

寒食初過天氣佳  
帝城名園綠藏鴉  
白綿紅雨互飄泊

鶯啼燕哢紛交加  
司成領客當暇日  
不惜醉臉生紅霞  
坐中賓客皆賢豪  
一一圭璧無纖瑕  
夕郎風采照今古  
封駁不貸姦與衰  
紫微筆語妙天下  
文鋒凜凜森莫邪  
左史聲名動六合  
宣特疇昔傳三巴  
一朝櫻筍德星聚  
離騷可奴玉可衙  
蘭亭觴詠僅堪比  
金谷歌舞徒能奢  
我有一匹好東絹  
誰為作圖千古誇

送楊飛卿國錄

楊侯作錄來成均  
野鶴昂昂端不羣  
一朝議論不入意

棄擲祿位如浮雲羣公挽衣留不住直入苕霅親耕耘  
惜吾無力叫帝閭不能以侯直諒聞

丙午仲春西湖舟中作

春陰將近一百六絮擘晴雲新雨足烟邊芳草碧如茵  
籬畔海棠紅映肉相攜逗曉出城西城西風景如杜曲  
兩岸雲光晷畫濃一湖春水蒲萄綠坐中豪俊雜吳蜀  
磊落羣書紛拄腹掀髯一笑浪波間淋漓衣袂尋碁局  
他年想像此風流應作生綃圖一幅



天台歌

涉海神仙誇蓬萊登陸勝地稱天台天台枕海連四明  
萬峯千嶺相縈迴赤城繡出綺霞色瀑布界破瑤山青  
神仙居處寸步有遊人白日迷杳冥剡溪昔年有二客  
五月此山同采摘只知采采不盈筐不覺行行失歸陌  
龜腸蟬腹忽鳴飢傾壺進食欲令誰山桃一顆垂林畔  
共食歛然肌骨換下山得水澗石中以手飲之還濯盥  
又見蕪菁出山腰一杯圓轉中流漂二人相顧却相謂

此地去人應不遙過溪水深四尺許又度一山逢二女  
韶顏艷色世所無南國東鄰何足數笑喚劉晨阮肇名  
相識渾如舊有情問郎若箇來何晚遂即殷勤相奉迎  
入戶幔帷殊不惡錯落珍珠與瓔珞只將左右幾青衣  
也勝人間誇綽約逡巡進脯飯胡麻瓊杯片片斟流霞  
不知仙客來何處各把宮桃慶女家歌吹嘈嘈張內樂  
顏色有歡情有樂金鴉飛入向虞淵客散虛堂掩簾箔  
夜深各擁一仙娥泛泛鴛鴦在綠波和鳴乍自秦簫起

行雨初從楚夢過，瞥然一留因半載。天氣常如三月在，  
百鳥哀鳴不可聞。感此茫茫愁似海，俗緣未斷身未輕。  
思歸日有求歸聲，更招女伴作離樂。共寫深衷無限誠，  
曲終一出山中洞。萬里雲烟空目送，歸來不見去時人。  
寂寞驚魂若春夢，子孫雖在不相知。欲尋舊路已多歧，  
昏迷柯嶺難重見。花失桃源空自悲，風流雲散令人惜。  
至今猶唱阮郎歸。

重陽

一年秋節重陽濃園林上下皆清風達山百里削寒玉  
平湖十畝磨青銅亦好茂樹翦西北露枝霜葉紛青紅  
枝頭寂寂少啼鳥天外隱隱飛征鴻弄月基蟠綠淨中  
東南况有小垂虹潭清潦盡境更好水落石出募難工  
愛山堂前花作叢疎疎楊柳瘦毛同紅蕉碧桂互掩映  
蘆花蓼穠交蒙茸新亭爽塬瞰空濶凭欄一目連七峯  
烟霏霧靄掃欲盡但見突兀撐晴空攜筇更登月山椒  
嶙峋怪石高玲瓏香爐近出陂陀側雲黃復在南山東

水聲激激來澗曲颼颼風響生樛松菊英萸實籬可採  
山肴野蔌盤能供作詩頗類臺戲馬吹帽未減山名龍  
良辰美景樂心賞四者偶并今始逢明朝不問蝶愁絕  
更飲黃花琥珀醲

次韻茂恭見寄

中書一揮千萬言如水懸呂梁間奔逸絕塵不可及  
蹇欲從之良獨難如君文字可華國胡為猶在南湖側  
樊川昌谷縱多才欲以比君那可得君家紅杏連白榆

似向君王得鑑湖水光溶溶浸山色樓臺上下如冰壺  
磬湖蕭瑟逢秋令男呻女吟貧非病阿奴碌碌僅自全  
伯氏今亡嗟短命恨我不如大小山徒爾思苦仍辭艱  
既無擊鉢揮毫敏空愧詩筒數往還

題李氏擁萬堂

我如王恭讀書少君如鄴侯藏書多排籤插架三萬軸  
知從何處能網羅上自先秦下五季興佚隱篇皆畧備  
不同邢邵嬾校讐丹墨精研吁可貴君不見廬山先生

子李子白石房中富文史胸蟠萬卷筆如神事業文章

俱兩美又不見西蜀劉公少常伯

今侍講侍郎劉公字詔美西蜀人也平

生醞芹嗜圖籍傾貲盡寫中秘書隨身卷軸車連軌邇  
來置書事經綸論思獻納日日新君今堂中書汗牛願  
君學李兼學劉盡攬英華歸肺腑一鳴便作沖天舉

月窓以所畫觀音見遺為賦一篇

白衣仙人雲海上肉眼欲看唯想像月窓道人心孔開  
貌得人天行道相吾聞伯時晚畫佛妙處不減王摩詰

龍眠久矣寂無人安得却有伯時筆

硯屏

長江遠浪連天碧岸柳垂垂臨斷石漁舟一葉白頭翁  
獨把釣絲待魚食我身猶是紅塵客對此無言三歎息  
安得輪竿入手來與君共釣消長日

以春孟送茂恭蒙以古詩為謝次韻奉酬

我家古甕彭亨腹十年貯酒色如玉傾瀉惟須老瓦盆  
精器便成蛇著足花瓷脆薄誰能攜遣送君家保不虧



雖然金盃未伯仲儻與椰樽相等夷

悲夏畦

案此詩據南宋名賢小集增入

悲夏畦南畝苗未長東臯草已齊旋令嫗婦辦餉饁獨  
引丁男耘稗穉悲夏畦炎天炙背如爇雞渴來不得飲  
清溪寧知水榭水山裏猶自頻嫌日未西

欽定四庫全書

香山集卷五

宋 喻良能 撰

五言律詩

題三洞

千古巢仙地嵌空本自然  
一看三嘆息十步九留連  
似入華陽洞疑通小有天  
何時洗塵垢來作枕流眠

三月六日宴李家園亭

林園過元已流水遶芳藪  
畧約半尋影醺醺一扇風  
杯

盤花氣裏枕簟鳥聲中公子敬愛客月明樽未空

郊行

散策林塘路秋深別有光晦明雲聚散濃淡樹青黃晚  
覺衣襟冷風吹橘柚香菊花何處有聊欲試重陽

次韻季野弟蠟梅

媚色全勝柳孤標半似梅藥寒金粉膩香重麝臍開徐  
筆那能畫并刀未易裁扶頭中酒味安得一枝來

讀書

傍砌看黃妳臨池誦子虛顧慚雖耗忘聊復惜居諸屋

上兩鸚鵡波間雙鯉魚疑他不識字何事也聽書

柳子厚答

許京兆書神志  
荒耗前後遺忘

### 讀玉局集

曉讀蘇僊集披翻未覺勞衙官視宋玉奴僕命離騷赤  
壁清風遠黃樓逸興高獨嗟生苦晚不得侍揮毫

### 留別伯壽兄

相過不憚遠相迎慰所思須知對床處絕勝陟岡時夜

雨論疇昔秋風惜別離明年楚東景準擬共題詩

之官桐川道中口占

登道重逢驛離家再及晨雲輕山色曉寒淺鳥聲春碧  
澗梅花老銀杯竹葉新前途風日好持用悅慈親

戲綵堂有作

捧檄及偏親斑衣聊效顰旨甘貧有味溫清靜無塵北  
戶足萱草南風宜棘薪版輿多喜色庶不愧安仁

堂之前有

棘一  
樹

次韻趙景明呈許明府

卜晝開英集瑤林映珎玦顧慚梅隱吏繆接范萊蕪官  
柳春猶淺江梅韻亦孤他年想風味應有汭川圖

對鏡芙蓉二嶺相望僅三十里高不知幾百尺  
十步九折殆不啻蜀道之難也已卯孟秋沿檄  
過之僕夫告痛已亦罷極因成小詩

石鏡寧堪對芙蓉不是花險中多虎跡平處少人家曲  
六蛇行迴欹危鳥道斜白雲宜入望不怕亂山遮

九日同尤司戶舟行遊梅山

令節逢重九相攜鑑上遊  
扁舟浮舴艋左手把蝤蛸  
紅葉明青眼黃花重白頭  
晚來風色好歸棹得夷猶

題聽雨軒

小軒在官舍不與囂塵并  
清池浸窓檻修篁礙簷楹  
幾當迢迢夜聽此瀟瀟聲  
懷哉對床約輾轉難為情

晚行竹山道中

山瘦溪如練丹青見亦稀  
亂鴉將影過孤鷺帶霞飛  
秋

色此時老故園何日歸西風吹獨立搔首怯征衣

始生之日黎明以職事出郊

征鞍隨曉色重露濕衣巾誰謂懸弧日翻為執轡辰野  
花工笑客啼鳥故窺人呼酒澆孤悶何心作好春

朝爽之前瑞竹忽生

好竹逾千箇數莖忽發生月明連理影風細合歡聲矯  
矯雙鴛鴦舉脩脩兩鳳鳴祇應三昧手綵筆畫難成

端午至太平寺



客裏逢端午僧廊雨氣涼簷簷千箇碧簷蔔六花香魯  
頰程尤遠潘興興自長糝蒲傾美酒笑入醉中鄉

題九華山用太白聯句韻

千古池陽郡九峰應最華明珠絢晨露麗綺粲晴霞嶺  
頭過子晉巖腹憩洪崖謫仙無復見空想夏侯家

題建德驛用經畧張舍人壁間韻

殘暑塗山去涼風至德來吟餘秋色老客裏菊花開傳  
舍全依石中庭半是苔張公有佳句三復興悠哉

新安遇雪

寒色今朝異，屯雲萬里同。  
定知花翦水，不是絮因風。  
薄宦翻成旅，愁吟未易工。  
白頭親八十，留滯楚江東。

次韻謝子良詠雪

晚來寒氣重，景物故撩人。  
不厭詩雕腎，寧辭酒入唇。  
恍驚殘夜月，疑夢故園春。  
欲倩何人畫，紛紛飛玉塵。

青巖道中

寒食江村路，東風野渡航。  
一篙春水碧，兩岸落花香。  
飛

絮絮遠青山故故長茲遊自奇絕底用更尋芳

周少府由姑熟送余同宿于玩鞭亭

相別古桃郡相逢南豫州五年勞望眼一笑失離愁  
碧水溪橋暮西風野店秋追隨成夜宿不為玩鞭留

寄陳孟容二首

先生湖海士餘子詎能班正始清談近黃初美句還相  
望半舍外契濶數年間何日衡茅底匏樽一破顏

細草還堪藉柔荊亦可班馭風如肯過踏月不妨還種

藥臨花畔分流遶竹間  
眼邊無俗物頗似一瓢顏

廣信道中

昔日題詩處重來續勝遊  
綠陰初入夏蒼鬢幾經秋  
細雨渡頭市孤煙汀際舟  
溪山雖信美翻恨不淹留

次韻侍御晚宿三义口

故里頻懷梓新堤未築沙  
文章真吏部吟詠許劉叉  
酒醺孤風物詩筒隔歲華  
相思江路遠煙雨茁芳葭

書大洞僧壁

招提閤林麓魚鼓白雲邊地僻疑無路山深別有天幽  
花充佛供好鳥伴僧禪何日征鞭暇重來借榻眠

寒食遊香山

杖藜隨所適花柳自村村野岸桃臨水人家竹映門香  
泥飛燕子芳草思王孫著處堪沈醉春醪正滿樽

被郡檄禱雨丹井山徐真君祠登山拜畢即獲  
霽霈追用韓文公郴州祈雨韻

欲解驕陽厄寧辭祀禮繁純誠殫翼翼英烈仰言言雲

陣千屯合雷聲萬馬奔晚來歸路好飄灑勢騰軒

紫霄宮

間關穿木杪詰屈轉山腰自昔形清夢于今到紫霄容  
儀粲冰雪環珮響瓊瑤安得顧吳手憑渠圖素綃

攝邑獄空

番邑於今劇民風自古雄琴堂慚久攝劍獄喜新空纏  
索塵埃裏桁楊片段中使君端不擾顧我百無功

石井

山石最佳處有泉生石傍虛明秋後月清冷雪前霜鰻井真牛後龍湫可鴈行濯纓仍漱齒政爾不能忘

游西源

萬里西源路秋風屐齒鳴嶙峋千障碧窈窕一川清天柱雲霄迥香爐霧靄輕何當攜翠袖重遣酒壺傾

奉和趙大本教授何處春深好二首

何處春深好春深泮水家不妨頻折角寧復誤隨車已見傾三峽行看判五花日邊催覲速芝檢紫泥斜

何處春深好春深倅貳家雨低簷外柳風度牖間花有  
意揮吟筆無心顧麴車慈顏一笑粲戲舞綵衣斜

景德道中口占

捧檄東方日芳春未及歸路花紅掩映溪樹綠因依鳥  
語催寒食人煙接翠微尋詩忘遠近細雨濕征衣

由安仁回宿大木寺

御史題詩處山深草木雄一番青燒雨十里錦帆風婆  
餅林間語山茶葉上紅明朝入於越吟詠與誰同



奉酬王宗丞用宿大本寺韻見贈

譽處千鈞重文章一世雄詩工穿月脇檄好愈頭風北  
嶽關山碧南州荔子紅使君今北海還許一樽同

送侍御帥夔府

湖海番君國江山白帝城凝香餘坐嘯飛詔趣徼征譽  
處千鈞重輜車一羽輕攀轅雪眉老送目逐雙旌  
千古楚東郡風流今在茲魯公元直道文正不妨詩鉗  
吏似東濕麾龍如使兒甘棠足遺愛會有去思碑

西風動行色詩景繞征鞍赤甲懸危壁黃牛瀉急湍猿  
聲雲背落山勢馬頭盤天險須人守毋辭蜀道難

諸葛仍祠廟公孫只故基棟梁酣夕照雉堞蔓秋葵耿  
耿登臨意悠悠今古思烹鮮不勞力餘事杜陵詩

四海猶多事中原未版圖皇心思啟沃赤子望霑濡八  
陣難留滯三階拱進趨茂弘寧有意江左待夷吾

被檄之上饒言還未幾又復往焉至小渡遇雨

遣興一首

檄至方云急吾行敢滯留朔風經小渡細雨過中洲

小渡

中流有洲名中洲

冉冉新斑鬢飄飄敝黑裘欲知來往久三見

月如鉤

九月五日周少府衛秀才會飲吳波亭周有詩

因次韻

碧水初微落黃花亦未簪三人千里客尊酒五年心我

獨年齊白

樂天云不覺身年四十  
七余年與之齊矣

君皆句似陰不妨鐺

脚坐聊作夜深吟

次韻王侍御夜宿高牙

相別三時久相望萬里賒攜書期過雁徙倚至昏鴉風  
雨番君國雲煙夔子家何時趣歸覲重許拜高牙

至日見梅

漸老身仍健多愁鬢易華異鄉逢至節細雨見梅花酒  
薄那能醉詩成敢自誇何時故園裏徙倚看橫斜

次韻俞尉春日遣興

漸欣長晝煖欲解短爐圍春色已如此故園猶未歸韋

編今日事回首去年非鏡裏衰遲色多慚壯志違

留別趙明府

綵棒漫分部牛刀新發硎花城方竊蔭瓜戍已餘蔭生  
計雙蓬鬢歸心幾驛亭他時重會面應是眼俱青

初離鄱陽

三年勞簿領今日進歸程意與長途遠身兼薄轂輕板  
輿頻送喜山驛屢逢晴道上人爭指霜髭綵戲榮

衢右道中

投曉行衢右經旬別楚東侵衣梅溽雨吹面麥秋風  
欽凝煙外峰巒滴翠中懸知鄉井近漸喜語音同

漸喜家居近相望六驛間脫身江左役洗眼浙東山  
鄉味初充饌慈闈亦破顏經過穀溪水應笑鬢毛斑

村居夜坐讀王右丞山中與裴迪書愛其清婉  
有魏晉風味因集其語作詩一首亦老坡哨遍  
之義也

景氣既和暢故園殊可依遠山映清月曲水涵淪漪寒

犬吠如豹村春聞自機因思曩昔友攜手同賦詩

獨善堂

賞心并四者文史足三餘不作簪紳念唯便水竹居住  
名元籍籍真樂每如如月旦遺評在今經幾建除

靈山寺

松竹聲中寺山深人迹稀石從林背出雲向屋頭飛野  
鹿寒仍聚棲禽暮自歸怪來襟袖冷濃翠濕征衣

買舟至九里松遊三天竺

解維凌皺玉輟棹理孤筇遊遍三天竺行窮九里松泉  
聲依石細山色共秋濃佳處吾能識幽巖倚秀峰



